

MESYUARAT KEDUA, PENGGAJAL KEEMPAT  
PARLIMEN KEEMPAT BELAS  
2021

**HARI ISNIN : 1 NOVEMBER 2021**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 3, 12 HINGGA NO. 35 )**

**NOTA: [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI RICHARD RIOT ANAK JAEM  
[SERIAN]**

**TARIKH : 1 NOVEMBER 2021 (ISNIN)**

**SOALAN**

**DATO' SRI RICHARD RIOT ANAK JAEM** minta **MENTERI PEMBANGUNAN LUAR BANDAR** menyatakan apakah usaha untuk meningkatkan bekalan air bersih dan elektrik di kawasan luar bandar Sarawak.

**JAWAPAN**

**Tuan Yang di-Pertua,**

Untuk makluman Yang Berhormat, bagi tempoh Rancangan Malaysia Kesebelas (RMK-11), Kementerian telah diluluskan peruntukan berjumlah RM1.486 bilion bagi tujuan pelaksanaan projek-projek Bekalan Elektrik Luar Bandar (BELB) di Negeri Sarawak yang telah memberikan bekalan kepada 21,535 buah rumah dengan anggaran 107,675 penerima manfaat. Manakala bagi tahun 2021 pula, sebanyak RM83.646 juta telah diperuntukkan.

Bagi Projek Bekalan Air Luar Bandar (BALB) pula, sejumlah RM2.4 bilion peruntukan telah diluluskan di bawah RMK-11 bagi pelaksanaan projek BALB di Negeri Sarawak. Sepanjang tempoh RMK-11, dianggarkan sebanyak 10,625 buah rumah telah menerima bekalan air bersih dengan anggaran 53,125 penerima manfaat. Manakala bagi tahun 2021 pula, sebanyak RM209.7 juta telah diperuntukkan.

Untuk makluman Yang Berhormat juga, pelaksanaan Projek BELB dan BALB oleh Kementerian adalah berdasarkan kepada senarai keutamaan negeri yang dikemukakan oleh Kerajaan Negeri Sarawak melalui Unit Perancangan Ekonomi Negeri (UPEN). Sehubungan itu, Yang Berhormat dipohon untuk mengemukakan permohonan kepada UPEN untuk dimasukkan sebagai senarai keutamaan negeri agar permohonan ini boleh diangkat kepada Unit Perancang Ekonomi, Jabatan Perdana Menteri untuk kelulusan peruntukan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS (2021)**

**PERTANYAAN : LISAN**

**DARIPADA : DR. ONG KIAN MING [ BANGI ]**

**TARIKH : 1 NOVEMBER 2021 [ ISNIN ]**

**SOALAN**

**DR. ONG KIAN MING** minta **MENTERI PERUMAHAN DAN KERAJAAN TEMPATAN** menyatakan bila Akta Penyewaan Kediaman (*Residential Tenancy Act*) akan dikemukakan di Parlimen dan apakah proses "*stakeholder consultation*" yang telah dan sedang dijalankan.

**JAWAPAN**

**Tuan Yang di-Pertua,**

1. Saya mohon izin untuk menjawab soalan **YB Bangi** secara bersekali dengan **soalan YB Johor Bahru** bertarikh 8 November 2021 kerana melibatkan isu dan persoalan yang sama.
2. Untuk makluman Ahli Yang Berhormat, bagi melindungi kepentingan serta hak penyewa dan pemilik kediaman, Kementerian ini sedang **menjalankan kajian dan penggubalan Akta Sewaan Kediaman/ Residential Tenancy Act (RTA)** yang telah bermula pada Jun 2019. Ketika ini, penyediaan perjanjian penyewaan kediaman menggunakan tatacara Akta Kontrak 1950 dan perjanjian itu bersifat umum yang tidak komprehensif serta tidak melindungi sepenuhnya kepentingan serta hak penyewa dan pemilik premis.
3. Akta baharu ini digubal berdasarkan model **Residential Tenancies Act 2010 (New South Wales) Australia** kerana akta ini dilihat mampu melindungi kepentingan pemilik kediaman dan penyewa. Pada masa yang sama, undang-undang berkaitan dari negara **Jerman, United Kingdom, dan Australia** serta **Rental Housing Act** dari **Afrika Selatan** juga turut dibuat perbandingan.
4. Sepanjang proses penggubalan Akta RTA ini, **sesi pengumpulan maklumat, data dan konsultasi** dengan pihak berkepentingan termasuk di peringkat Kerajaan Persekutuan, kerajaan negeri, Badan-badan Bukan Kerajaan (NGO), Badan-badan Profesional, pihak swasta, pemaju dan pihak-pihak yang berkepentingan diadakan dari semasa ke semasa bagi tujuan kajian ke atas isu-isu gubalan Akta RTA ini.
5. Selain daripada sesi libat urus yang komprehensif dengan pelbagai pihak berkepentingan, **Regulatory Impact Assessment (RIA)** akan turut dilaksanakan bersama pihak **Perbadanan Produktiviti Malaysia (Malaysia Productivity Corporation, MPC)** bagi mengenal pasti dan menilai kesan daripada cadangan penggubalan Rang Undang-Undang (RUU) RTA. Konsultasi awam yang menggunakan Portal **Unified Public**

**Consultation** (UPC) akan dijalankan untuk mendapat maklum balas terhadap cadangan akta ini. Pandangan daripada semua pihak berkepentingan dan yang berkaitan akan diambil kira untuk penambahbaikan RUU RTA.

6. Cadangan penggubalan RUU RTA telahpun dibentangkan dalam Mesyuarat Jemaah Menteri pada 23 Jun 2021 dan telah mendapat kelulusan prinsip untuk dibentangkan dalam sesi parlimen. Seterusnya, pihak Kementerian **sedang menyemak draf awal RUU RTA** dan menyediakan dokumentasi bagi prosedur untuk melaksanakan RIA.

7. Memandangkan hubungan antara tuan tanah dengan penyewa terletak di bawah **bidang kuasa negeri** sebagaimana diperuntukkan dalam Perkara 76(4) Perlembagaan Persekutuan, maka cadangan RUU RTA dirancang untuk dibentangkan dalam **Mesyuarat Majlis Negara Bagi Kerajaan Tempatan (MNKT)** bagi memastikan RUU ini boleh dan sesuai untuk dilaksanakan. Setelah dibentangkan di MNKT, draf RUU ini akan dikemukakan ke Jabatan Peguam Negara bagi semakan terakhir sebelum dibentangkan di Parlimen. **RUU RTA ini dijangka akan dibentangkan di Parlimen pada sesi persidangan suku ketiga tahun 2022.**

Sekian, terima kasih.

**Nota:**

Jangkaan proses RIA selesai:	Disember 2021
Jangkaan pembentangan kepada MNKT:	Februari/ Mac 2022
Jangkaan RUU dikemukakan kepada AGC:	Mac 2022
Jangkaan MJM kepada Jemaah Menteri:	Jun 2022
Jangkaan pembentangan di Parlimen:	Julai 2022

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB DATO' NGEH KOO HAM (BERUAS)**

**TARIKH : 1 NOVEMBER 2021 (ISNIN)**

**SOALAN**

**DATO' NGEH KOO HAM [ BERUAS ]** minta **MENTERI DALAM NEGERI** menyatakan jumlah kes penipuan yang berlaku melalui media sosial untuk 5 tahun yang lepas, jumlah nilai wang mangsa-mangsa yang tertipu dan apakah tindakan Kerajaan yang telah dan akan diambil untuk mengatasi masalah ini.

**JAWAPAN**

Tuan Yang Di Pertua,

Kes-kes penipuan telekomunikasi yang disebutkan oleh Yang Berhormat adalah seperti Belian Online, Pinjaman Tidak Wujud, Pelaburan, *African Scam*, *Macau Scam* dan *Business Email Compromise* (BEC) yang menyebabkan kerugian yang besar kepada mangsa.

Pada tahun 2016 hingga 10 Oktober 2021, sebanyak 86,475 kes telah disiasat oleh pihak PDRM berkaitan kes penipuan. Daripada jumlah tersebut seramai 35,905 orang telah ditangkap dan 19,122 kes telah dituduh di mahkamah dengan nilai kerugian berjumlah RM2,856,378,006.92. Berdasarkan statistik mendapati kes Belian Online mencatatkan kes tertinggi berbanding dengan kes-kes yang lain iaitu sebanyak 32,794 kes, tangkapan seramai 8,924 orang dan 6,278 kes telah dituduh dimahkamah pada tempoh yang sama.



## SOALAN NO : 12

Pelbagai usaha telah dijalankan oleh PDRM dalam mengekang sindiket penipuan seperti ini termasuklah dengan meningkatkan penguatkuasaan undang-undang, pengoperasian, tangkapan dan seterusnya menjalankan pendakwaan ke atas mereka yang terlibat dalam penipuan.

Di antara langkah-langkah lain yang telah diambil dan dirancang oleh pihak polis termasuklah:

- a) Permohonan kepada Suruhanjaya Komunikasi Multimedia (SKMM) untuk meminta menurunkan iklan-iklan haram berkaitan penipuan online ini;
- b) Mewujudkan platform akaun Facebook "*Cyber Crime Alert Royal Malaysia Police*" untuk memberikan pendedahan kepada masyarakat mengenai skim pelaburan tidak wujud ini. Satu portal juga telah dibangunkan oleh PDRM bagi memudahkan orang awam untuk membuat semakan nombor telefon sindiket ataupun akaun-akaun bank yang digunakan oleh sindiket dalam urusan penipuan. Portal tersebut boleh dicapai melalui pautan <http://ccid.rmp.gov.my/semakmule> dan ianya boleh dimuatnaik dengan menggunakan telefon mudah alih;
- c) Mewujudkan CCID *Scam Respond Center* di talian 0326101559 atau 0326101599 di mana orang ramai boleh membuat panggilan untuk mendapatkan maklumat dan menyemak kesahihan panggilan bagi sebarang transaksi yang meragukan. Talian ini beroperasi dari jam 09.00 pagi hingga 10.00 malam pada setiap hari; dan
- d) Mengambil tindakan di bawah Akta Pencegahan Penggubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001(AMLATFPUAA) bagi tujuan pembekuan dan pelucuthakan wang dari akaun sindiket juga diambil oleh pihak PDRM. Bagi mana-mana suspek yang tidak cukup keterangan untuk dituduh di mahkamah, mereka akan dikenakan tindakan dibawah undang-undang pencegahan seperti Akta Pencegahan Jenayah 1959 (POCA).

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' SRI ABDUL AZEEZ BIN ABDUL RAHIM  
[BALING]**

**TARIKH : 1 NOVEMBER 2021 (ISNIN)**

**SOALAN**

Minta **MENTERI BELIA DAN SUKAN** menyatakan apakah perancangan Kementerian dalam memastikan anak-anak muda khususnya yang berumur 18 – 20 tahun ini benar-benar faham proses demokrasi di Malaysia dan diberikan pendidikan politik yang sewajarnya agar mereka lebih bersedia untuk mengundi dalam PRU yang akan datang.

**JAWAPAN**

**Tuan Yang di-Pertua,**

Untuk makluman Yang Berhormat, Kementerian melalui Institut Pembangunan dan Kecemerlangan Kepimpinan (i-LEAD) telah merangka dan melaksanakan program-program kenegaraan yang bertujuan untuk memupuk semangat patriotik di samping membina jati diri yang utuh di kalangan belia di negara ini termasuklah dalam memahami proses demokrasi dan pendidikan politik.

Antara inisiatif yang telah dilaksanakan ialah **Program Rukun Negara@Belia (RNB)**.

Objektif utama program RNB adalah:

- i. Mewujudkan kesedaran belia tentang peranan, keterlibatan dan pengetahuan tentang kelayakan mengundi dari usia 18 tahun;

## SOALAN NO : 13

- ii. Melahirkan golongan belia yang sedar dan memahami tentang konsep berkerajaan serta melibatkan diri secara langsung dalam soal demokrasi sesebuah negara;
- iii. Membantu belia meningkatkan jati diri untuk menjadi warganegara yang bertanggungjawab; dan
- iv. Meningkatkan nilai patriotik di kalangan belia.

Program RNB juga digarap selaras dengan bidang-bidang keutamaan belia yang digariskan di dalam Dasar Belia Malaysia (DBM) yang menyasarkan lapan (8) kumpulan sasaran belia iaitu belia bersekolah, belia pengajian tinggi, belia bekerjaya, belia berpersatuan, belia massa, belia Malaysia antarabangsa, belia minoriti dan golongan terpinggir.

Ia bagi memastikan ilmu kenegaraan dapat dipelajari dan difahami dengan lebih meluas oleh segenap lapisan belia di negara ini melalui kaedah interaktif, ringkas dan padat. Pengisian program meliputi penghayatan Prinsip Rukun Negara dan sistem pemerintahan negara berpandukan kepada Perlembagaan Persekutuan dan institusi-institusi sedia ada agar menghasilkan masyarakat yang bersatu padu dan cakna kepada susur galur pentadbiran negara.

Pengisian utama program ini adalah untuk membawa kesedaran dan menggerakkan golongan belia bagi menunaikan tanggungjawab sebagai pengundi berikutan penurunan had umur mengundi dari 21 tahun kepada 18 tahun selain meningkatkan pengetahuan literasi politik. Sebanyak 114 program RNB dirancang untuk dilaksanakan pada tahun 2021. Sehingga **15 Oktober 2021**, sebanyak **94** program telah dilaksanakan melibatkan penyertaan seramai **57,771** orang secara dalam talian dan juga secara bersemuka.

Secara khususnya pelaksanaan program RNB akan menekankan kepada empat (4) matlamat berikut:

- (i) Meningkatkan **kesedaran** belia mengenai hak dan tanggungjawab sebagai warganegara dalam mencorakkan

proses demokrasi negara berdasarkan kebijaksanaan dan kesedaran politik yang lebih matang.

- (ii) Meningkatkan **kefahaman** mengenai proses demokrasi dan sistem pilihanraya negara melalui pendidikan politik berpandukan kepada Perlembagaan Persekutuan dan institusi-institusi kenegaraan.
- (iii) Meningkatkan **kepercayaan** belia kepada kedaulatan sistem demokrasi di negara ini dan keyakinan terhadap pelaksanaan proses pilihanraya yang adil dan telus.
- (iv) Meningkatkan tahap **keterlibatan** dan pembudayaan belia dalam memupuk sosialisasi politik yang berlandaskan falsafah, nilai-nilai murni politik demi mengimbangi kesedaran dan kematangan politik ke arah masa hadapan negara yang lebih progresif.

Di samping itu juga melalui Program Malaysia Future Leaders Schools (MFLS) Tier 3 anjuran i-LEAD KBS, seramai 148 orang peserta telah didedahkan mengenai proses demokrasi serta pendidikan politik melalui Simulasi Persidangan Dewan Rakyat. Salah satu pengisian modul ini adalah Suara Belia di Parlimen dengan mewujudkan perwakilan dari pihak Kerajaan dan pihak pembangkang dalam pembentangan usul bertajuk “Undi 18 Mencorak Malaysia Baharu”.

Peserta yang mengambil bahagian tampak bersedia dan yakin dalam hujah-hujah mereka dalam sesi perbahasan. Program ini adalah dengan kerjasama Pejabat YDP Dewan Rakyat dan dilangsungkan secara atas talian. Penglibatan aktif peserta dalam simulasi ini memperlihatkan anak muda sudah berani menyuarakan pendapat melalui hujah-hujah mereka dan nampak bersedia untuk menjadi sebahagian daripada penggubal undang-undang pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT, PARLIMEN  
KEEMPAT BELAS**

**PERTANYAAN : LISAN**

**DARIPADA : TUAN RAMKARPAL SINGH A/L  
KARPAL SINGH [ BUKIT GELUGOR ]**

**TARIKH : 1 NOVEMBER 2021 (ISNIN)**

**SOALAN**

**TUAN RAMKARPAL SINGH A/L KARPAL SINGH [ BUKIT GELUGOR ]** minta **MENTERI KESIHATAN** menyatakan berkenaan jumlah kos terperinci yang telah dibelanjakan untuk pembelian vaksin setakat bulan Oktober 2021 dan berapa jumlah vaksin yang telah dibeli oleh Kerajaan dan berapa jumlah vaksin yang telah disumbangkan oleh Kerajaan negara-negara lain.

**JAWAPAN**

Tuan Yang di-Pertua,

1. Sebanyak **87.9 juta dos vaksin** telah ditempah oleh KKM melalui Fasilitas COVAX *dan* secara rundingan terus dengan beberapa pengeluar vaksin COVID-19 yang melibatkan implikasi kewangan sebanyak **RM4.64 billion meliputi kos vaksin dan logistik vaksin**. Perincian perolehan vaksin COVID-19 adalah seperti berikut:

BIL.	PENGELUAR	BIL. DOS	LIPUTAN POPULASI
1.	<b>COVAX Facility</b> AstraZeneca	<b>6.4 juta</b> (2 dos/seorang)	<b>10%</b> (3.2 juta penduduk)
2.	<b>Pfizer &amp; BioNTech</b> (BNT162b2)	<b>44.8 juta</b> (2 dos/seorang)	<b>70%</b> (22.4 juta penduduk)
3.	<b>AstraZeneca /</b> University of Oxford (AZD1222)	<b>6.4 juta</b> (2 dos/seorang)	<b>10%</b> (3.2 juta penduduk)
4.	<b>Sinovac Biotech</b> Ltd./Pharmaniaga Lifescience Sdn. Bhd. (CoronaVac)	<b>20.4 juta</b> (2 dos/seorang)	<b>31.88%</b> (10.2 juta penduduk)
5.	<b>CanSino Biologics</b> Inc. (AD5-nCOV)	<b>3.5 juta</b> (1 dos/seorang)	<b>10.94%</b> (3.5 juta penduduk)
6.	<b>Gamaleya</b> (Sputnik V)	<b>6.4 juta</b> (2 dos/seorang)	<b>10%</b> (3.2 juta penduduk)
<b>JUMLAH</b>		<b>87.9 juta dos</b>	<b>142.82%</b> <b>(45.7 juta penduduk)</b>

**Nota:**

- i) Gamaleya – Tertakluk kepada kelulusan pendaftaran vaksin yang diterima daripada NPRA dan PBKD.

2. Memandangkan Kerajaan Malaysia terikat dengan *Non Disclosure Agreement* (NDA) iaitu syarat kerahsiaan yang ditetapkan syarikat pengeluar vaksin, maklumat-maklumat terperinci setiap perjanjian tidak boleh didedahkan termasuklah harga vaksin. Walau bagaimanapun, kos perolehan bagi setiap jenis vaksin telah dijelaskan dalam Prosiding Jawatankuasa Kira-Kira Wang Negara (PAC), Mesyuarat Khas Parlimen Keempat Belas yang telah dijalankan sebelum ini.

3. Dalam masa yang sama, Kerajaan Malaysia telah menerima sumbangan vaksin COVID-19 daripada beberapa buah negara seperti:

- (a) Jepun sebanyak 998,400 dos (AstraZeneca);
- (b) Amerika Syarikat sebanyak 1,000,350 dos (Comirnaty)
- (c) China sebanyak 500 ribu dos (CoronaVac); dan
- (d) United Kingdom sebanyak 415 ribu dos (AstraZeneca).

4. Dalam usaha untuk sama-sama meringankan beban dan kesukaran dalam menghadapi pandemik COVID-19, Kementerian Luar Negeri dan MOSTI pada bulan Jun 2021 telah menyumbang sebanyak 50 ribu dos vaksin Sinovac kepada Kerajaan Bosnia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS TAHUN 2021**

---

**PERTANYAAN : LISAN**

**DARIPADA : TUAN NIK MOHAMAD ABDUH BIN NIK  
ABDUL AZIZ [BACHOK]**

**TARIKH : 1 NOVEMBER 2021 (ISNIN)**

**SOALAN**

**TUAN NIK MOHAMAD ABDUH BIN NIK ABDUL AZIZ [ BACHOK ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan pelan tindakan bersepadu Kementerian bagi menangani isu penipuan jualan atas talian selaras dengan langkah pendigitalan ekonomi.

**JAWAPAN**

**Tuan Yang di-Pertua,**

Untuk makluman Ahli Yang Berhormat, antara usaha yang telah dibuat oleh Kementerian untuk menangani isu penipuan penjualan atas talian adalah melalui:

1. Pewartaan Peraturan-Peraturan Perlindungan Pengguna (Urus Niaga Perdagangan Elektronik) 2012 yang berkuatkuasa mulai 1 Julai 2013. Melalui pewartaan peraturan ini, setiap pengendali pasar dalam talian diwajibkan untuk memaparkan di laman web maklumat-maklumat seperti berikut:
  - i. Nama individu/perniagaan/syarikat;



- ii. Nombor pendaftaran perniagaan/syarikat;
  - iii. Alamat emel dan no.telefon atau alamat peniaga melalui tapak web atau pasar dalam talian;
  - iv. Perihalan tentang ciri utama barang dan perkhidmatan;
  - v. Harga penuh barang atau perkhidmatan, termasuklah kos pengangkutan, cukai dan apa-apa kos lain;
  - vi. Kaedah pembayaran;
  - vii. Terma-terma dan syarat syarat; dan
  - viii. Anggaran masa penghantaran barang atau perkhidmatan kepada pembeli.
2. Menjalankan pemeriksaan dan pemantauan di premis pengendali pasar dalam talian dan laman web yang berorientasikan perniagaan agar mematuhi peraturan-peraturan yang ditetapkan seperti mempamerkan harga barangan atau perkhidmatan, penyimpanan dan penyenggaraan rekod nama, nombor telefon dan alamat peniaga online yang berniaga di platform pasar dalam talian untuk tempoh dua (2) tahun.
3. Menjalinkan kerjasama dengan Suruhanjaya Komunikasi dan Multimedia Malaysia (SKMM) bagi menghalang akses laman web (*Site Blocking*) dan penurunan kandungan (*contents removal*) bagi mana-mana sesawang perniagaan yang tidak beretika.
4. Meningkatkan kerjasama dengan Pembekal Perkhidmatan Internet (ISP) dan Syarikat Telekomunikasi (Telcos) bagi mendapatkan butiran maklumat pemilik laman sesawang atau pemilik talian komunikasi yang terlibat dengan penipuan pasar dalam talian; dan
5. Berkerjasama dengan pengendali pasar dalam talian untuk sama-sama membantu membuat pemakluman atau notis amaran kepada

pengguna/pembeli supaya berhati-hati semasa menjalankan transaksi pembelian di pasar dalam talian.

Sekiranya mana-mana peniaga dalam talian gagal mematuhi mana-mana peruntukan di dalam Peraturan-Peraturan Perlindungan Pengguna (Urusniaga Perdagangan Elektronik) 2012 semasa menawarkan untuk membekalkan barangan atau perkhidmatan, aduan boleh dipanjangkan kepada Kementerian melalui saluran-saluran yang disediakan.

Usaha dan langkah kerjasama yang dijalankan oleh Kementerian diharap mampu mengekang peningkatan isu penipuan jualan dalam talian di samping dapat memberikan ketelusan dalam urus niaga perdagangan elektronik dan pada masa yang sama meningkatkan keyakinan pengguna terhadap pembelian atas talian.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB DATO' MOHD AZIS BIN JAMMAN  
(SEPANGGAR)**

**TARIKH : 1 NOVEMBER 2021 (ISNIN)**

**SOALAN**

**DATUK MOHD. AZIS BIN JAMMAN [ SEPANGGAR ]** minta **MENTERI DALAM NEGERI** menyatakan jumlah aset dan peralatan pengawasan yang ada di kawasan ESSzone ketika ini dan adakah Kementerian bercadang untuk menambah aset dan peralatan tersebut seperti radar dan bot tempur bagi memastikan fencing yang sempurna di kawasan ini.

**JAWAPAN**

Tuan Yang Di Pertua,

Kerajaan melalui *Eastern Sabah Security Command* (ESSCOM) sentiasa terus meningkatkan keupayaan dan kesiagaan aset-aset untuk memastikan keberkesanan pengawasan kawalan dan penguatkuasaan serta mewujudkan elemen cegah rintang yang efektif di ESS Zone. Tiga (3) elemen pasukan keselamatan utama yang terlibat iaitu ATM, PDRM dan APMM telah beroperasi secara bersepadu di ESS Zone dan sentiasa bersiap sedia untuk diatur gerak pada sebarang masa mengikut Kawasan Tanggungjawab (KTJ) masing-masing. Sehingga kini, sebanyak 304 aset milik pasukan keselamatan dan pertahanan sedia untuk beroperasi di ESS ZONE.

Berhubung dengan penambahan aset bagi mewujudkan kawasan *fencing* yang menyeluruh di ESS Zone, KDN telah mengemukakan permohonan di bawah RMKe-12 untuk pembinaan pos kawalan baharu, pangkalan laut dan pos operasi hadapan (*Forward Operation Base*) serta perolehan aset strategik berasaskan teknologi terkini untuk tujuan pengesanan dan pemantauan keselamatan di pantai timur Sabah.

Sehingga kini, sebanyak 97 aset pertahanan dan keselamatan yang sedang beroperasi. Manakala 207 aset pula berada dalam keadaan sedia untuk di atur gerak (*standby*) di ESS Zone.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS (2021)**

**PERTANYAAN : LISAN**

**DARIPADA : TUAN HAJI WAN HASSAN BIN MOHD  
RAMLI (DUNGUN)**

**TARIKH : 1 NOVEMBER 2021 (ISNIN)**

**SOALAN**

**TUAN HAJI WAN HASSAN BIN MOHD RAMLI** minta **MENTERI PERUMAHAN DAN KERAJAAN TEMPATAN** menyatakan perancangan untuk melaksanakan projek-projek perumahan mampu milik (seperti PR1MA) yang baharu kepada rakyat yang menetap di Terengganu khususnya di Dungun.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) bertanggungjawab menyediakan perumahan yang berkualiti, kondusif serta berdaya huni, khususnya kepada golongan B40 dan M40. Justeru, saya mengucapkan terima kasih atas keprihatinan Ahli Yang Berhormat dalam memastikan projek-projek perumahan mampu milik terus diberi perhatian.

Kerajaan akan terus komited untuk meningkatkan bekalan Rumah Mampu Milik (RMM) selaras dengan prestasi yang telah digariskan dalam RMKe-12. Seperti Ahli Yang Berhormat sedia maklum, KPKT telahpun melaksanakan projek-projek RMM di negeri Terengganu. Ini termasuklah:

## SOALAN NO : 17

- i. Program Perumahan Rakyat (PPR) - setakat ini terdapat 1 projek yang telah siap dibina (PPR Padang Hiliran) pada tahun 2015 melibatkan 1,002 unit rumah, 1 projek dalam pembinaan (PPR Kuala Nerus) melibatkan 500 unit rumah yang dijangka siap pada tahun hadapan dan 1 projek dalam perancangan (PPR Besut) melibatkan 450 unit rumah yang akan dimulakan pembinaan dalam masa yang terdekat. Jumlah unit keseluruhan PPR di Terengganu adalah sebanyak 1,952 unit rumah;
- ii. Rumah Mesra Rakyat (RMR) di bawah Syarikat Perumahan Negara Berhad (SPNB) - setakat ini terdapat 6,673 unit yang telah siap dibina, 722 unit masih dalam pembinaan dan 567 unit rumah masih dalam perancangan. Di Dungun sahaja, bagi RMR setakat ini terdapat 758 unit rumah yang telah siap dibina, 73 unit rumah dalam pembinaan dan 35 unit rumah dalam perancangan;
- iii. Kediaman SPNB - setakat ini 318 unit dalam pembinaan dan 213 unit rumah dalam perancangan. Di Dungun sahaja, terdapat 70 unit rumah dalam pembinaan; dan
- iv. Perumahan Penjawat Awam Malaysia (PPAM) - terdapat 12 projek PPAM melibatkan 515 unit rumah di mana 10 projek telah siap melibatkan 455 unit dengan 3 daripadanya terletak di Dungun (125 unit). Bagi dua projek yang masih dalam pembinaan, satu projek adalah di Kemaman melibatkan 16 unit manakala satu lagi projek adalah di Marang yang masih dalam pembinaan (fasa1 & fasa 2 melibatkan 185 unit) dan dijangka siap pada tahun 2024.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN TEH KOK LIM [ TAIPING ]**

**TARIKH : 1 NOVEMBER 2021 (ISNIN)**

**SOALAN**

**TUAN TEH KOK LIM [ TAIPING ]** minta **MENTERI KESIHATAN** menyatakan jumlah peruntukan yang disalurkan kepada Hospital Taiping dan senaraikan peralatan baru yang dibekalkan sejak tahun 2018, 2019, 2020 serta 2021.

**JAWAPAN**

Tuan Yang di-Pertua,

1. Bagi tahun 2018 hingga 2021, Kementerian Kesihatan telah menyalurkan peruntukan berjumlah RM729,739,771.39 di bawah Peruntukan Mengurus dan Peruntukan Pembangunan kepada Hospital Taiping.

2. Di bawah **Peruntukan Mengurus**, jumlah keseluruhan peruntukan yang disalurkan kepada Hospital Taiping bagi tiga tahun tersebut ialah sebanyak RM722,294,727. Agihan peruntukan adalah seperti berikut:

- (a) Tahun 2018 sebanyak RM188,400,000
- (b) Tahun 2019 sebanyak RM271,718,513
- (c) Tahun 2020 sebanyak RM252,345,980
- (d) Tahun 2021 sebanyak RM198,230,233

3. Di bawah **Peruntukan Pembangunan** pula, jumlah keseluruhan peruntukan yang disalurkan kepada Hospital Taiping bagi empat tahun tersebut ialah sebanyak RM11,899,874. Agihan peruntukan adalah seperti berikut:

- (a) Tahun 2018 sebanyak RM431,000
- (b) Tahun 2019 sebanyak RM4,661,586;
- (c) Tahun 2020 sebanyak RM1,226,518; dan
- (d) Tahun 2021 sebanyak RM5,580,770.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN RUBIAH BINTI HAJI WANG  
[ KOTA SAMARAHAN ]**

**TARIKH : 1 NOVEMBER 2021 (ISNIN)**

**SOALAN**

minta **MENTERI PEMBANGUNAN USAHAWAN DAN KOPERASI** menyatakan inisiatif terkini Kementerian membantu usahawan muda yang gulung tikar kesan COVID-19.

**JAWAPAN**

Tuan Yang di-Pertua,

1. Kementerian Pembangunan Usahawan dan Koperasi (MEDAC) melalui agensi-agensi di bawahnya sentiasa komited dalam membantu usahawan yang gulung tikar akibat penularan pandemik COVID-19 terutamanya usahawan muda.

2. Untuk makluman Yang Berhormat, sejak tahun 2020 hingga September 2021, antara inisiatif yang dilaksanakan adalah seperti berikut:

- (i) **TEKUN Nasional** menyediakan pembiayaan sedia ada dengan nilai pembiayaan sehingga RM100 ribu kepada usahawan yang terkesan termasuklah usahawan muda bagi membayar sewa premis, bil utiliti dan kos operasi untuk mengelakkan risiko gulung tikar. Seramai 51,863 usahawan muda (18 - 40 tahun) telah diluluskan pembiayaan yang berjumlah RM680.3 juta.
- (ii) Perbadanan Nasional Berhad (**Pernas**) telah melancarkan Projek Jadi Usahawan Berjaya [(*Be Your Own Boss* (BYOB))], di mana salah satu programnya iaitu Program Pembiayaan Keusahawanan Francais Belia [(*Young Entrepreneurship Engagement Talent* (YOUNITY))].
- (iii) Program ini mensasarkan untuk melahirkan 1,000 francaisi merangkumi golongan graduan, belia, wanita dan asnaf. Sehingga September 2021, seramai 590 peserta telah mendaftar dalam projek BYOB ini dan sebanyak 18 permohonan pembiayaan berjumlah RM5.98 juta telah diluluskan oleh pihak PERNAS.

3. Bagi membantu usahawan muda bangkit semula selepas gulung tikar, MEDAC menyediakan program konsultasi dan khidmat bantuan melalui Institut Keusahawanan Negara (**INSKEN**). Sehingga Oktober 2021, INSKEN telah melaksanakan program berikut:

- (i) program **INSKEN e-BizClinic** yang menjalankan konsultasi dan khidmat bantuan secara satu sama satu (*one-to-one*) secara percuma kepada usahawan terlibat. Seramai **723 orang** telah mendaftar dalam program ini dengan penglibatan seramai **463 (64%)** usahawan muda untuk terus kekal bertahan dalam perniagaan.
- (ii) INSKEN turut melaksanakan program latihan khusus berbentuk teknikal untuk membimbing, membangun dan memperkuat operasi harian merangkumi aspek pengurusan perniagaan, kewangan, operasi, jualan dan pemasaran. Seramai **19,688 peserta** telah mendaftar dengan penglibatan **12,797 (65%)** usahawan muda. Program tersebut ialah:
  - Kursus Asas Keusahawanan (KAK);
  - Kursus Asas Industri INSKEN (INBT);
  - INSKEN Business Training (IBT); dan
  - INSKEN Masterclass.

4. MEDAC juga telah mengambil ketetapan supaya proses permohonan pembiayaan bagi dana Kerajaan di bawah agensi MEDAC tidak akan mengambil kira penilaian CTOS dan CCRIS dalam tempoh pandemik ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS TAHUN 2021**

---

**PERTANYAAN : LISAN**

**DARIPADA : TUAN KHALID BIN ABD SAMAD  
[SHAH ALAM]**

**TARIKH : 01 NOVEMBER 2021 (ISNIN)**

**SOALAN**

**TUAN KHALID BIN ABD SAMAD [ SHAH ALAM ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah perkembangan terkini berkenaan Indeks Kos Sara Hidup yang telah mula dirangka pada Jun 2019 sewaktu pemerintahan Pakatan harapan.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Jabatan Perangkaan Malaysia (DOSM) sedang memuktamadkan kajian indeks kos sara hidup. Namun, kajian tersebut hanya melibatkan bandar-bandar utama di Malaysia. Kementerian bercadang untuk meluaskan lagi indeks tersebut di bandar-bandar lain. Kriteria-kriteria bersesuaian akan turut diluaskan mengambil kira keunikan setiap bandar yang termasuk dalam kajian tersebut kelak.

Walau bagaimanapun, adalah diingatkan bahawa kajian yang dijalankan ini dibuat sebelum berlakunya penularan pandemik Covid-19 serta semakan semula garis kemiskinan baharu. Kementerian ini berpandangan bahawa kajian semula perlu dilaksanakan dengan mengambil kira dua perkara yang dinyatakan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA,PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHARLES ANTHONY SANTIAGO  
[KLANG]**

**TARIKH : 1 NOVEMBER 2021 (ISNIN)**

**SOALAN**

minta **MENTERI PEMBANGUNAN USAHAWAN DAN KOPERASI** menyatakan jumlah dan sebab-sebab penutupan SMEs termasuk bilangan pekerja yang terjejas bagi tahun 2020 dan 2021. Dan apakah cadangan Kementerian untuk membantu SME ini supaya memulakan perniagaan mereka.

**JAWAPAN**

Tuan Yang di-Pertua,

1. Kementerian Pembangunan Usahawan dan Koperasi (MEDAC) telah melaksanakan Kaji Selidik Ke Atas Usahawan kesan Perintah Kawalan Pergerakan (PKP) pada tahun 2020 dan 2021. Berdasarkan kaji selidik tersebut, sebanyak 104,784 Perusahaan Mikro, Kecil dan Sederhana (PMKS) telah gulung tikar dan memberi impak kepada 611,010 orang pekerja pada tahun 2020. Bagi tahun 2021 pula, sebanyak 37,415 PMKS telah menamatkan operasi yang memberi kesan kepada hampir 175,200 orang pekerja. (Anggaran 1 perusahaan mengupah 5 orang pekerja)

2. Untuk makluman Yang Berhormat, kaji selidik MEDAC juga mendapati antara sebab-sebab PMKS menutup operasi atau gulung tikar adalah kerana:

- (i) tidak dapat beroperasi seperti biasa kerana terikat dengan pematuhan SOP dalam Perintah Kawalan Pergerakan (PKP).
- (ii) masalah aliran wang tunai sehingga menjejaskan operasi perniagaan.
- (iii) produk atau perkhidmatan yang ditawarkan kurang mendapat permintaan daripada pelanggan semasa tempoh pelaksanaan PKP; dan
- (iv) gangguan rantaian bekalan yang menyebabkan kesukaran mendapat bekalan bahan mentah dan kenaikan harga bahan mentah.

3. Dalam hal ini, MEDAC komited dalam membantu usaha memulihkan semula PMKS yang telah gulung tikar. Bagi tujuan tersebut, MEDAC telah menyediakan skim pembiayaan bagi membantu PMKS yang gulung tikar, antaranya seperti:

- (i) Skim Pembiayaan Pemulihan Perniagaan Mikro 2.0 (CBRM 2.0) di bawah TEKUN yang menyediakan pembiayaan sehingga RM20,000.
- (ii) Skim Pembiayaan PKS BRFlex-i di bawah Bank Rakyat yang menyediakan pembiayaan sehingga RM1 juta.
- (iii) Projek Jadi Usahawan Berjaya [(*Be Your Own Boss* (BYOB))] di bawah Pernas yang menyediakan pembiayaan sehingga RM500 ribu.

4. MEDAC juga telah mengambil ketetapan supaya proses permohonan pembiayaan bagi dana Kerajaan di bawah agensi MEDAC tidak akan mengambil kira penilaian CTOS dan CCRIS dalam tempoh pandemik ini.

5. Selain itu, tempoh kelulusan pembiayaan termasuk proses penyaluran juga disegerakan dan kriteria permohonan dipermudahkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : DR. KELVIN YII LEE WUEN [ BANDAR KUCHING ]**

**TARIKH : 1 NOVEMBER 2021 (ISNIN)**

**SOALAN**

**DR. KELVIN YII LEE WUEN [ BANDAR KUCHING ]** minta **MENTERI KESIHATAN** menyatakan kesediaan dan pelan Kementerian untuk menambah baik proses pengesanan kontak (*contact-tracing*) yang sangat penting untuk mengawal sebarang penularan wabak COVID-19 dan juga pandemik-pandemik yang akan datang.



**JAWAPAN**

**Tuan Yang di-Pertua,**

1. Pengesanan kontak (*contact tracing*) adalah salah satu aktiviti penting dalam tindakan kawalan dan pencegahan penyakit berjangkit, bagi menghalang penularan jangkitan berterusan dalam komuniti. Aktiviti ini sebaik-baiknya dijalankan sejurus selepas notifikasi kes positif diterima dan terus membuat penentuan kluster dengan mengaitkan data epidemiologi kes-kes ini.
2. Bagi memudahcara siasatan kes dan kontak dalam menentusahkan kluster, Kementerian Kesihatan telah menggunakan aplikasi MySejahtera bagi notifikasi kes dan pengesanan kontak. Selain itu, mobilisasi petugas dari pelbagai agensi kerajaan dan swasta juga dilakukan bagi menjalankan aktiviti secara fizikal terutama di kawasan dengan liputan internet yang rendah.
3. Selain proses pengesanan kontak (*contact-tracing*) yang sedia ada, Kementerian Sains, Teknologi dan Inovasi (MOSTI) dan Kementerian Kesihatan sedang membangunkan satu lagi modul pengesanan kontak dalam MySejahtera dengan menggunakan kaedah *Bluetooth*. Dengan menggunakan kaedah ini, dua komponen dapat dianalisa iaitu komponen masa dan jarak dan ini sekaligus dapat meningkatkan lagi ketepatan pengesanan kontak secara digital.

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB TUAN DR. ONG KIAN MING (BANGI)**

**TARIKH : 1 NOVEMBER 2021 (ISNIN)**

**SOALAN**

**DR. ONG KIAN MING [ BANGI ]** minta **MENTERI DALAM NEGERI** menyatakan jumlah pemegang visa MM2H yang tidak memohon untuk melanjutkan visa mereka pada tahun 2020 dan 2021 dan jumlah permohonan MM2H yang baru dan yang diluluskan pada tahun 2020 dan 2021.

**JAWAPAN**

Tuan Yang Di Pertua,

Untuk makluman Ahli Yang Berhormat, berdasarkan rekod Kementerian Dalam Negeri melalui Jabatan Imigresen Malaysia sehingga 30 September 2021, jumlah pemegang pas Program Malaysia Rumah Keduaku (MM2H) yang aktif adalah seramai 56,394 orang yang terdiri daripada 27,803 prinsipal dan 28,591 tanggungan.

Manakala, bagi persoalan Ahli Yang Berhormat mengenai jumlah permohonan MM2H yang telah diluluskan bagi tahun 2020 dan 2021, dimaklumkan bahawa Program MM2H akan diaktifkan semula dijangka mulai Oktober 2021 setelah semua proses berkaitan perundangan selesai. Justeru, Kementerian Dalam Negeri belum mempunyai rekod atau statistik terkini peserta Program MM2H setelah diperkenalkan syarat baharu yang dapat diberikan buat masa ini.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SERI HAJI IDRIS BIN JUSOH  
[ BESUT ]**

**TARIKH : 1 NOVEMBER 2021 (ISNIN)**

**SOALAN**

minta **MENTERI PEMBANGUNAN USAHAWAN DAN KOPERASI** menyatakan langkah yang diambil Kementerian dalam membantu usahawan perusahaan Kecil dan Sederhana (PKS), khasnya di kalangan generasi muda di luar bandar bagi memastikan peluang pendapatan mereka dapat ditingkatkan.

**JAWAPAN**

Tuan Yang di-Pertua,

1. Kementerian Pembangunan Usahawan dan Koperasi (MEDAC) bersama agensi sentiasa komited dalam membantu golongan usahawan daripada pelbagai lapisan masyarakat. Pelbagai program latihan dan bimbingan serta kemudahan pembiayaan disediakan untuk usahawan-usahawan PMKS termasuk usahawan generasi muda di luar bandar.

2. Untuk makluman Yang Berhormat, di antara program-program yang dilaksanakan melalui agensi-agensi dibawah Kementerian adalah seperti berikut:

- (i) **Program Online Onboarding Coaching Programme (e-Board)** oleh INSKEN bertujuan untuk memperkukuhkan kemampuan dan kapasiti usahawan mikro, kecil dan sederhana tempatan dalam penggunaan platform *online* melalui latihan dan bimbingan teknikal secara intensif.
- (ii) **Program Tunas Usahawan Belia Bumiputera (TUBE)** oleh SME Corp. Malaysia bertujuan untuk menggalakkan **golongan belia** menceburi bidang perniagaan melalui latihan keusahawanan berkaitan dengan asas perniagaan dan membentuk daya tahan serta jati diri di kalangan belia dalam mengendalikan perniagaan sendiri.
- (iii) **Program Pembangunan Usahawan Mikro (BizME) Micro Connector** juga oleh SME Corp. Malaysia disediakan untuk **usahawan luar bandar**, perusahaan mikro dan juga komuniti B40 dengan latihan asas dan bantuan teknikal serta sokongan yang merangkumi bantuan awal pembiayaan bagi menubuhkan dan mengembangkan perniagaan.

- (iv) **Projek Jadi Usahawan Berjaya [(Be Your Own Boss (BYOB))]**, di mana salah satu programnya iaitu **Program Pembiayaan Keusahawanan Francais Belia [(Young Entrepreneurship Engagement Talent (YOUNITY))]** oleh Pernas bertujuan untuk melahirkan usahawan francais melalui panduan dan latihan yang berstruktur dan komprehensif, padanan perniagaan, pembiayaan serta akses kepada pasaran semasa, dan dipantau selama enam bulan selepas perniagaan bermula.
- (v) **Skim Pembiayaan Sektor Informal (SPIN) 2.0** oleh TEKUN Nasional adalah skim pembiayaan yang mensasarkan kepada **usahawan mikro** yang tidak berlesen. Nilai pembiayaan diberikan sehingga RM10,000 ini tidak dikenakan kadar keuntungan (0% interest).

3. Sebagai usaha untuk meningkatkan penglibatan golongan muda dalam perniagaan khususnya melalui gerakan koperasi, syarat penubuhan koperasi juga telah dipermudahkan dengan mengurangkan jumlah anggota daripada 50 orang kepada 20 orang dan juga membenarkan penubuhan koperasi dengan hanya 5 orang anggota sahaja khusus bagi kumpulan profesional seperti doktor, arkitek dan akauntan. Ini adalah selaras dengan Pelan Transformasi Koperasi Malaysia (TransKoM 2021 - 2025) yang dilancarkan pada Mac 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI HAJI AHMAD BIN HAJI MASLAN  
[ PONTIAN ]**

**TARIKH : 1 NOVEMBER 2021 (ISNIN)**

**SOALAN**

**DATUK SERI HAJI AHMAD BIN HAJI MASLAN** minta **MENTERI PEMBANGUNAN LUAR BANDAR** menyatakan apakah perancangan untuk memperbaiki kehidupan pekebun kecil di seluruh negara dan bagaimanakah perkembangan program aktiviti ekonomi untuk tambah pendapatan rakyat yang diusahakan RISDA, FELCRA, PERDA, KETENGAH, KESEDAR, dan KEJORA.

**JAWAPAN**

**Tuan Yang di-Pertua,**

Untuk makluman Yang Berhormat, sebagai perancangan untuk memperbaiki kehidupan pekebun kecil di seluruh negara, Kementerian melalui **RISDA** telah membentuk Model Perancangan Strategik RISDA (MPSR) Tahun 2021 – 2025. Melalui MPSR 2021 – 2025, sebanyak empat (4) teras, 12 inisiatif dan 33 program/projek yang akan dilaksanakan sepanjang tempoh Rancangan Malaysia Kedua Belas (RMKe-12). Program-program yang dirancang ialah:

- i. Tanam Semula Getah (TSG);
- ii. Tanam Semula Getah Sambungan (TSGS);
- iii. Angkutan Kawasan Pedalaman;

- iv. Bantuan Tabung Pelancaran (BTP);
- v. Pengembangan;
- vi. Prasarana Asas Pertanian (PAP);
- vii. Skim Getah Matang (SGM);
- viii. Kemudahan Infrastruktur Pemasaran (KIP);
- ix. Pembangunan Hasil Baharu Agromakanan; dan
- x. Aktiviti Ekonomi Tambahan (AET) dan Keusahawanan

Dari segi perkembangan program aktiviti ekonomi, RISDA melaksanakan Program AET dan Keusahawanan, dan telah berjaya membelanjakan sejumlah RM164.15 juta daripada peruntukan yang diluluskan berjumlah RM165.64 juta dalam tempoh Rancangan Malaysia Kesebelas (RMKe-11). Seramai 14,543 orang usahawan pekebun kecil telah berjaya dibantu untuk meningkatkan pendapatan mereka.

Program AET dan Keusahawanan ini diteruskan pelaksanaannya bagi tempoh RMKe-12 iaitu sepanjang tahu 2021 hingga 2025 melibatkan kos projek yang berjumlah RM336.47 juta dan akan memberi manfaat kepada 35,510 orang usahawan pekebun kecil. Bagi tahun 2021, sejumlah RM20.19 juta telah diperuntukkan dan akan memberi manfaat kepada seramai 2,212 orang usahawan pekebun kecil.

Tuan Yang di-Pertua,

Sehingga kini, terdapat 12 program yang telah/sedang dijalankan oleh **FELCRA** yang memberi manfaat serta menaiktaraf kehidupan kepada warga peserta. Antara program yang dilaksanakan adalah seperti berikut:

- i. Program Kelestarian Dan Kemampanan Infrastruktur Pelancongan Desa;
- ii. Program *Urban Farming* - Tanaman Kontan Secara Fertigasi;
- iii. Program Menaik Taraf Premis Perniagaan;
- iv. Program Promosi Dan Pemasaran Produk Usahawan;
- v. Program Pembangunan Modal Insan Peserta FELCRA;
- vi. Program Tanaman Kontan Dan Herba Secara Fertigasi Untuk Belia Dan Wanita FELCRA

Tuan Yang di-Pertua,

**PERDA** pula tidak melaksanakan sebarang program melibatkan pembangunan pekebun kecil. Walau bagaimanapun, bagi aktiviti pembangunan ekonomi untuk peningkatan pendapatan rakyat, PERDA telah dan sedang menyediakan pelbagai insentif kepada usahawan-usahawan kecil di bawah bimbingannya untuk meneruskan perniagaan masing-masing seperti program-program berikut:

- i. Pemberian moratorium kepada usahawan;
- ii. Pengecualian sewaan premis perniagaan PERDA;
- iii. Pengecualian sewaan tanah PERDA kepada petani;
- iv. Skim Pinjaman Mudah Perniagaan (SPiM);
- v. Program promosi produk usahawan secara maya dan fizikal;
- vi. Penganjuran latihan dan kursus secara webinar;
- vii. Program naik taraf premis perniagaan usahawan bimbingan; dan
- viii. Program naik taraf premis kemudahan pelancongan desa.

Tuan Yang di-Pertua,

Pihak **KETENGAH** turut tidak melaksanakan sebarang program melibatkan pekebun kecil dalam aktiviti peladangan komoditi kelapa sawit dalam Wilayah KETENGAH. Aktiviti peladangan kelapa sawit yang dijalankan adalah melalui anak syarikat dan syarikat usahasama KETENGAH sahaja. Namun demikian, bagi pembangunan ekonomi, KETENGAH telah melaksanakan program-program seperti Program Peningkatan Pendapatan, Program Desa Lestari, Program Bantuan Peralatan Perniagaan, Program Bantuan Input Pertanian dan Ternakan serta Projek Pertanian Berkelompok dan Fertigasi.

Pelaksanaan program-program ini melibatkan 2,190 penerima manfaat yang terdiri daripada usahawan, peserta e-Kasih, golongan B40 dan koperasi komuniti dalam wilayah KETENGAH dengan peruntukan berjumlah RM28 juta. Pembangunan program ini telah memberi tambahan



pendapatan sebanyak RM500.00 hingga RM2,500.00 kepada penerima manfaat yang terlibat.

Tuan Yang di-Pertua,

Perkembangan aktiviti ekonomi untuk pertambahan pendapatan rakyat yang diusahakan **KESEDAR** adalah meliputi beberapa program pembangunan seperti berikut:

- i. Program Keusahawanan
  - a. Integpreneur Belia Wilayah KESEDAR;
  - b. Projek Industri Kotej Bersepadu; dan
  - c. Program Peningkatan Kualiti Produk.
- ii. Ladang Peneroka KESEDAR iaitu KESEDAR menguruskan Program Tanam Semula bagi kawasan seluas 11,855 hektar ladang sawit bagi pihak 2,228 peneroka KESEDAR di 9 buah Rancangan Kemajuan Tanah.

Tuan Yang di-Pertua,

Untuk makluman Yang Berhormat, **KEJORA** sentiasa melaksanakan pelbagai usaha dan program aktiviti ekonomi bagi meningkatkan pendapatan penduduk di wilayah KEJORA. Antara usaha-usaha yang dilaksanakan adalah seperti berikut:

- i. Projek Pembangunan Ternakan Sarang Burung Walit berkelompok Kg. Belukar Durian;
- ii. Program Komuniti Sejahtera (PKS) yang merupakan program bantuan kewangan dalam bentuk pulangan dividen dan perkongsian keuntungan kepada kumpulan sasar;
- iii. Ternakan lebah kelulut yang diusahakan oleh Koperasi Kg. Baru Sungai Seluyut Kota Tinggi Berhad;

## SOALAN NO : 25

- iv. Skim Pembiayaan Ekonomi Pertanian (SPEP) iaitu program bantuan peralatan pertanian;
- v. Program Projek Ekonomi Pertanian Berskala Kecil bertujuan untuk menggalakkan penglibatan peserta kursus pertanian di sekitar wilayah KEJORA;
- vi. Program Skim Bantuan Modal Niaga (SBMN) yang merupakan bantuan dalam bentuk peralatan yang boleh membantu meningkatkan pengeluaran hasil produk usahawan;
- vii. Latihan Keusahawanan, Program Promosi Produk usahawan secara online serta Program Transformasi Kualiti Produk (KEJORA BEST);
- viii. Terdapat juga usaha yang dilakukan bagi memastikan kemudahan prasarana perniagaan seperti premis dan ruang niaga sentiasa dalam keadaan sempurna untuk kemudahan penyewa menjalankan perniagaan; dan
- ix. Program Sokongan Pengukuhan Keusahawanan Luar Bandar (SPKLB) iaitu pemberian geran padanan 70:30.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK HAJI HASANUDDIN BIN MOHD YUNUS  
[HULU LANGAT]**

**TARIKH : 1 NOVEMBER 2021 (ISNIN)**

**SOALAN**

**DATUK HAJI HASANUDDIN BIN MOHD YUNUS** minta **MENTERI KESIHATAN** menyatakan adakah kerajaan ingin mengetat dan menaikkan lagi denda di bawah Akta Racun 1952 bagi mereka yang memiliki dan menjual cecair rokok elektronik yang mengandungi nikotin bagi membendung generasi muda terlibat dengan unsur yang tidak sihat.

**JAWAPAN**

Tuan Yang di-Pertua,

1. Kementerian Kesihatan kini sedang dalam proses meminda Akta Racun 1952 bagi mengemas kini Akta tersebut agar selaras dengan keperluan semasa. Pindaan ini melibatkan peruntukkan peningkatan hukuman termasuklah denda bagi kesalahan-kesalahan berkaitan racun.
2. Buat masa ini, nikotin yang terdapat dalam cecair vape telah disenaraikan sebagai racun Kumpulan C di bawah Jadual Pertama, Akta Racun 1952. Terdapat kawalan ke atas aktiviti seperti pengimportan, pengilangan, penjualan dan pembekalan di bawah Akta Racun 1952. Di bawah akta ini penjualan nikotin hanya boleh dilakukan oleh ahli farmasi berlesen atau pengamal perubatan berdaftar **untuk rawatan perubatan sahaja**. Penjualan sediaan mengandungi nikotin bagi tujuan selain daripada untuk rawatan perubatan merupakan satu kesalahan di bawah Akta Racun 1952.
3. Sesiapa yang melakukan kesalahan di bawah Akta Racun 1952 dan jika disabitkan kesalahan boleh dihukum dengan denda tidak melebihi RM3,000 atau penjara tidak melebihi satu (1) tahun atau kedua-duanya sekali.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB TUAN WAN HASSAN MOHD RAMLI  
(DUNGUN)**

**TARIKH : 1 NOVEMBER 2021 (ISNIN)**

**SOALAN**

**TUAN HAJI WAN HASSAN BIN MOHD RAMLI [ DUNGUN ]** minta **MENTERI DALAM NEGERI** menyatakan perancangan Kementerian untuk meningkatkan kawalan keselamatan terutamanya di sempadan antara negara Malaysia dan Thailand bagi menyekat penyeludupan dadah ke negara kita yang masih berleluasa.

**JAWAPAN**

Tuan Yang Di Pertua,

KDN merancang untuk menggunakan teknologi terkini bagi melaksanakan pengawasan dan penguatkuasaan sempadan. PDRM melalui KDN telah mengemukakan permohonan perolehan aset melalui RMKe-12 iaitu aset berteknologi terkini *Artificial Intelligence* seperti *drone*, dan radar berkeupayaan tinggi.

Selain itu, KDN juga telah mendapat kelulusan Jemaah Menteri pada 12 Mac 2021 untuk melaksanakan Rasionalisasi Agensi Kawalan Sempadan Malaysia (AKSEM) yang mana fungsi dan peranan AKSEM diserapkan di bawah pentadbiran PDRM. Melalui kaedah ini, penguatkuasaan di sempadan negara akan lebih berfokus dan dipertingkatkan dengan penggabungan kekuatan sedia ada PDRM dan AKSEM di seluruh sempadan negara.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DR. KELVIN YII LEE WUEN  
[ BANDAR KUCHING ]**

**TARIKH : 1 NOVEMBER 2021 ( ISNIN )**

**SOALAN**

**DR. KELVIN YII LEE WUEN [ BANDAR KUCHING ]** minta **MENTERI KESIHATAN** rancangan Kementerian untuk memperkenalkan polisi "*booster dose*" COVID-19 dari segi kumpulan yang diutamakan dan mekanisme bagaimana ia diimplementasikan.

**JAWAPAN**

Tuan Yang di-Pertua,

1. Kerajaan pada 19 September 2021 telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19.
2. Selaras dengan keputusan tersebut, pada 17 Oktober 2021, satu Surat Pekeliling Ketua Pengarah Kesihatan Bil. 17/2021 bertajuk **Perluasan Pelaksanaan Program Imunisasi COVID- 19 Kebangsaan ( PICK) dengan Pemberian Dos Tambahan dan Dos Pengalak ( Booster).**
3. Polisi Pemberian Dos Tambahan dan Dos Penggalak ini dilaksanakan berdasarkan **pengesyoran Jawatankuasa Teknikal Khas Penetapan Polisi bagi pemberian Dos Tambahan Vaksin COVID-19 melibatkan pakar-pakar perubatan berdasarkan maklumat terkini hasil kajian dalam dan luar negara kepada Jawatankuasa Khas**

**Jaminan Akses COVID- 19 (JKJAV).** JKJAV seterusnya telah bersetuju untuk melaksanakan **pemberian dos tambahan dan dos penggalak secara sukarela pada 30 September 2021.**

4. Objektif pemberian kedua-dua dos tersebut adalah untuk **memastikan tempoh perlindungan yang optimum diperolehi oleh penerima vaksin COVID- 19 di Malaysia.** Pelaksanaan tersebut adalah seperti berikut:

#### **5.1 Pemberian dos tambahan**

- a) Pemberian dos tambahan akan diberikan kepada **individu yang mempunyai imunit yang rendah (*immunocompromised*) seperti yang diperincikan dalam *Clinical Guidelines on COVID-19 Vaccination in Malaysia, 4th Edition*;**
- b) Pemberian dos tambahan akan diberikan **sekurang-kurangnya selepas 28 hari menerima dos primer terakhir; dan**
- c) Pemilihan vaksin bergantung kepada kelulusan indikasi penggunaan oleh Pakar Perubatan merawat serta bekalan vaksin yang tersedia sama ada daripada jenis yang sama (homologous) atau berlainan ( heterologous) dengan dos primer terakhir.

#### **5.2 Pemberian Dos Penggalak**

- a) Pemberian dos penggalak **akan diberikan keutamaan kepada kumpulan rentan dan berisiko tinggi terhadap jangkitan COVID- 19 ( *breakthrough infection*) iaitu:**
  - i. Petugas kesihatan;
  - ii. warga emas; dan
  - iii. Penghuni termasuk petugas di pusat jagaan kesihatan jangka panjang seperti pusat penjagaan warga emas, *nursing home* dan sebagainya.

## SOALAN NO : 28

- b) Pemberian dos penggalak akan diperluaskan kepada semua penduduk apabila mereka melewati tempoh yang disyorkan selepas menerima vaksin dos lengkap.
  - c) Pemberian dos penggalak akan diberikan sekurang-kurangnya enam bulan selepas penerimaan dos primer lengkap bagi vaksin Comirnaty. Tempoh masa pemberian bagi penerima dos primer lengkap vaksin selain Comirnaty akan ditentukan berdasarkan kelulusan indikasi penggunaan dan syor pakar perubatan.
  - d) Pemilihan Vaksin (*homologous* atau *heterologous*) bergantung kepada kelulusan indikasi penggunaan serta bekalan vaksin yang tersedia.
5. Pemberian vaksin bagi dos tambahan dan penggalak ini perlulah daripada jenis vaksin yang telah diluluskan dan berdaftar dengan Pihak Berkuasa Pihak Berkuasa Kawalan Dadah (PKPD). **Pada 8 Oktober 2021, PKPD telah memberikan kelulusan bersyarat sebagai dos penggalak kepada Vaksin Comirnaty (Pfizer- BioNTech).**
6. Mesyuarat JKJAV Bil. 18/2021 juga telah meluluskan pelaksanaan pemberian vaksin dos tambahan secara heterologous kepada individu yang akan melakukan perjalanan ke luar negara bagi memenuhi syarat yang ditetapkan oleh negara-negara berkenaan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS (2021)**

**PERTANYAAN : LISAN**

**DARIPADA : DATO' SRI RICHARD RIOT ANAK JAEM  
(SERIAN)**

**TARIKH JAWAB : 1 NOVEMBER 2021 (ISNIN)**

**SOALAN**

**DATO' SRI RICHARD RIOT ANAK JAEM** minta **MENTERI  
PERUMAHAN DAN KERAJAAN TEMPATAN** menyatakan bilakah Balai  
Bomba dan Penyelamat akan dibina di bandar Mutiara, Tebedu.

**JAWAPAN**

Tuan Yang di-Pertua,

Untuk makluman Ahli Yang Berhormat, pihak Kementerian sentiasa komited dalam memperluaskan capaian perkhidmatan kebombaan bagi memastikan aspek keselamatan dan kesejahteraan rakyat terus terjamin.

Pada masa kini, kawasan Bandar Mutiara, Tebedu telah mendapat khidmat kebombaan daripada Balai Bomba dan Penyelamat (BBP) Serian dengan jarak 38 kilometer yang mengambil masa lebih kurang 40 minit untuk sampai ke kawasan tersebut.

Berhubung dengan cadangan pembinaan balai bomba di kawasan Tebedu, Kementerian melalui Jabatan Bomba dan Penyelamat Malaysia (JBPM) telah memiliki sebidang tapak tanah seluas 2.92 ekar di kawasan tersebut bagi tujuan pembinaan balai bomba kategori D. Cadangan pembinaan Balai Bomba dan Penyelamat (BBP) Tebedu ini telah dirancang untuk dimasukkan dalam Rancangan Malaysia Kedua Belas (RMKe-12) mengikut keutamaan. Walau bagaimanapun, pelaksanaannya bergantung kepada kelulusan agensi pusat serta keupayaan peruntukan kewangan semasa.

Bagi memastikan penduduk di kawasan Tebedu mendapat perkhidmatan kebombaan yang sewajarnya, Kementerian melalui JBPM juga telah merancang untuk mempertingkatkan penubuhan Bomba Komuniti di kawasan tersebut yang akan bertindak sebagai pasukan tindak balas awal kecemasan (*first responder*) sementara menunggu ketibaan anggota bomba dari balai yang berhampiran. Pada masa kini, di kawasan Tebedu terdapat sebanyak 12 Pasukan Bomba Komuniti yang mendapat latihan dan dibekalkan dengan alat pemadam api oleh JBPM Negeri Sarawak.

Selain itu, pemerkasaan pembudayaan amalan keselamatan kebakaran dalam kalangan komuniti setempat kawasan Tebedu juga akan terus dipertingkatkan melalui pelaksanaan program-program seperti berikut:

- i. mewujudkan **Program *Community Emergency Response Team (CERT)*** melalui inisiatif Kerajaan Negeri Sarawak yang bertujuan untuk melatih masyarakat tempatan di suatu lokaliti sebagai Pasukan Bertindak Awal (*First Responder*);
- ii. mempertingkatkan kempen kesedaran keselamatan kebakaran termasuk Program 1 Rumah Satu Alat Pemadam Api (**1RAPI**), Program Sedia Urus Isi Rumah (**SURI**) dan penyediaan alat pengesanan asap serta gas (**MyAlert**);
- iii. mempergiatkan **program latihan dan pencegahan** di kawasan-kawasan luar bandar/ pedalaman (*Outreach and Summer Camp*) melibatkan hampir 13 kampung di kawasan Tebedu bermula dari tahun 2019 sehingga 2020.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS, TAHUN 2021**

**PERTANYAAN : LISAN**

**DARIPADA : TUAN WONG KAH WOH [ IPOH TIMUR ]**

**TARIKH : 1 NOVEMBER 2021 (ISNIN)**

**SOALAN**

**TUAN WONG KAH WOH [ IPOH TIMUR ]** minta **MENTERI SUMBER MANUSIA** menyatakan jumlah kehilangan pekerjaan sejak PKP 1.0 pada Mac 2020 yang lepas. Nyatakan status pembayaran Elaun Kehilangan Pendapatan dan jumlah yang mendapat manfaat.

**JAWAPAN**

**Tuan Yang di-Pertua,**

1. Untuk makluman Ahli-Ahli Dewan Yang Mulia ini, berdasarkan statistik Sistem Insurans Pekerjaan (SIP) PERKESO, jumlah kehilangan pekerjaan sejak 18 Mac 2020 hingga 25 Oktober 2021 adalah seramai 147,371 orang.
2. Berdasarkan statistik SIP PERKESO juga, sejak PKP 1.0 pada 18 Mac 2020 hingga 25 Oktober 2021 seramai 118,123 orang telah menerima manfaat melibatkan bayaran Elaun Mencari Pekerjaan (EMP) yang telah disalurkan berjumlah RM 540.35 juta.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB TUAN CHOW KON YEOW (TANJONG)**

**TARIKH : 1 NOVEMBER 2021 (ISNIN)**

**SOALAN**

**TUAN CHOW KON YEOW [ TANJONG ]** minta **MENTERI DALAM NEGERI** menyatakan syarat kelayakan terkini diguna pakai bagi peserta MM2H sedia ada dan logik kriteria pelaksanaan bagi permohonan baru. Adakah syarat pembaharuan visa bagi peserta MM2H sedia ada tertakluk kepada syarat baru selepas tamat tempoh visa mereka. Nyatakan pro dan kontra berbanding polisi sedia ada dan berapa keuntungan/kerugian kepada pendapatan ekoran pelaksanaannya.

**JAWAPAN**

Tuan Yang Di Pertua,

Untuk makluman Ahli Yang Berhormat, pada 5 Oktober 2021, semasa menggulung perbahasan Rancangan Malaysia Kedua Belas (2021-2025) peringkat Kementerian Dalam Negeri, Dewan Yang Mulia ini telah dimaklumkan bahawa peserta-peserta Program Malaysia Rumah Keduaku (MM2H) sedia ada tidak akan tertakluk kepada syarat-syarat baharu MM2H, kecuali peningkatan fi pas yang dinaikkan daripada RM90 kepada RM500 setahun dan syarat tempoh keberadaan di Malaysia iaitu minimum selama 90 hari setahun secara kumulatif. Kelonggaran yang diberikan kepada peserta sedia ada Program MM2H ini akan terpakai semasa permohonan pelanjutan bagi pas MM2H sedia ada dan akan terus berkuatkuasa sepanjang tempoh sah laku pas. Walau bagaimanapun, bagi semua peserta

baharu, mereka perlu memenuhi dasar dan syarat-syarat penyertaan yang baharu.

Program MM2H ditambahbaik berdasarkan kepada faktor ekonomi, keselamatan, penandaarasan dengan negara lain, hasil laporan kajian oleh perunding yang dilantik oleh Kementerian Pelancongan, Seni dan Budaya dan penemuan Jabatan Audit Negara serta sebagai sebahagian daripada strategi untuk menyokong Pelan Pemulihan Negara (PPN). Penambahbaikan ini juga dilaksanakan bagi memastikan peserta program ini yang berada di Malaysia adalah benar-benar *genuine*, berkualiti tinggi dan dapat memberi sumbangan yang positif kepada pertumbuhan ekonomi.

Program MM2H akan diaktifkan semula dijangka mulai Oktober 2021 setelah semua proses berkaitan perundangan selesai. Justeru, tiada rekod atau statistik berkaitan keuntungan atau kerugian yang dapat diberikan buat masa ini.

Dimaklumkan juga bahawa program MM2H adalah disasarkan kepada golongan pesara dan berpendapatan tinggi yang berhasrat untuk tinggal di Malaysia bagi tempoh masa yang panjang dan hendak berbelanja di Malaysia. Sehubungan itu, Kerajaan yakin tidak akan timbul isu kehilangan pendapatan yang disebabkan dengan penambahbaikan program MM2H. Sebaliknya, Kerajaan melihat ke hadapan dan optimistik dengan inisiatif penambahbaikan syarat-syarat kelayakan akan menjana kesan berganda yang positif kepada ekonomi negara terutamanya kepada sektor hartanah, pendidikan, kesihatan, pelancongan perubatan melalui perbelanjaan domestik oleh peserta MM2H yang berkualiti tinggi dan *genuine*.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS (2021)**

**PERTANYAAN : LISAN**

**DARIPADA : DATO' HAJI CHE ABDULLAH  
BIN MAT NAWI [ TUMPAT ]**

**TARIKH : 1 NOVEMBER 2021 [ ISNIN ]**

**SOALAN**

**DATO' HAJI CHE ABDULLAH BIN MAT NAWI** minta **MENTERI PERUMAHAN DAN KERAJAAN TEMPATAN** menyatakan rancangan Kementerian membekukan pembinaan hartanah mewah bagi mengimbangi permintaan rumah mampu milik yang tinggi ketika ini.

**JAWAPAN**

**Tuan Yang di-Pertua,**

Untuk makluman Ahli Yang Berhormat, isu pembinaan hartanah yang tidak seimbang atau dengan izin *mismatch of supply and demand* telah sedikit sebanyak menjejaskan pasaran hartanah serta pertumbuhan ekonomi negara. Bagi menangani isu ini, Kementerian telah dan sedang berusaha mencari jalan penyelesaian yang komprehensif dengan semua pemain industri perumahan.

Kementerian ini mengakui bahawa di negara ini terdapat kategori rumah mewah yang telah menyumbang kepada kadar lambakan rumah tidak terjual (*overhang*) yang tinggi. Sebagai contoh, terdapat sebanyak 3,684 unit rumah atau 11.8% rumah mewah berharga RM1 juta dan ke atas tidak terjual buat masa ini. Walau bagaimanapun, bilangan rumah mewah bernilai RM1 juta ke atas hanyalah merupakan sebilangan kecil daripada keseluruhan rumah di negara ini. Bagi suku kedua tahun 2021 (Q2 2021), sebanyak 14,155 unit rumah mewah telah dilancarkan (*unit*

*launched*) iaitu 9.67% daripada keseluruhan rumah yang dilancarkan sebanyak 146,415 unit.

Dalam prinsip ekonomi yang sihat, produk yang dibekalkan ke pasaran seharusnya berdasarkan penawaran dan permintaan (*supply and demand*). Antara faktor yang menyebabkan berlakunya lambakan rumah yang tidak terjual adalah disebabkan oleh harga yang tidak berpadanan dengan kemampuan pembeli berdasarkan lokaliti, jenis rumah yang tidak diminati dan lokasi yang kurang strategik seperti jauh dari pusat ekonomi dengan ketiadaan pengangkutan awam yang sesuai.

Untuk makluman Ahli Yang Berhormat juga, Kerajaan tidak bercadang untuk membekukan pembinaan hartanah mewah memandangkan pembinaannya tidak melibatkan peratusan yang tinggi. Walau bagaimanapun, beberapa langkah telah dikenal pasti bagi mengurangkan ketidaksepadanan penawaran dan permintaan (*supply and demand*) dalam industri perumahan iaitu:

- i. cadangan untuk memperkenalkan peraturan/ garis panduan kepada para pemaju perumahan untuk mengemukakan kajian kebolehlaksanaan (*feasibility study*) semasa memohon Kebenaran Merancang (KM). Hasil kajian ini dapat membantu mengelak daripada berlakunya sebarang pembangunan perumahan yang tidak relevan dengan permintaan pasaran; dan
- ii. pembangunan sistem Analisis Data Raya (*Big Data Analytics*; BDA) Perumahan bagi mendapatkan gambaran sebenar kedudukan dan ketersediaan data berkaitan sektor perumahan di Malaysia. Untuk makluman Ahli Yang Berhormat, kajian ini telah dimulakan pada bulan Februari 2021. Hasil kajian ini akan menentukan halatuju pembangunan sistem BDA dengan objektif seperti berikut:
  - a) membantu untuk mengetahui kedudukan pasaran perumahan hartanah yang lebih jelas dan tepat demi pembangunan sektor hartanah yang lestari dan efisien;



- b) dijadikan input bagi pembangunan platform pusat pengumpulan data hartanah yang meliputi permintaan dan penawaran; dan
- c) membantu pihak Kerajaan dalam membuat keputusan di peringkat Persekutuan dan kerajaan negeri dalam penyediaan dasar dan perancangan perumahan negara yang lebih komprehensif.

Pada masa yang sama, Kerajaan akan terus komited untuk meningkatkan bekalan Rumah Mampu Milik (RMM) selaras dengan strategi yang telah digariskan dalam RMKe-12. Di bawah KPKT khususnya untuk golongan B40, terdapat 154 projek Program Perumahan Rakyat (PPR) Disewa dan PPR Dimiliki yang telah siap dibina dan menyediakan 97,196 unit rumah. Bagi Rumah Mesra Rakyat (RMR) di bawah Syarikat Perumahan Negara Berhad (SPNB), yang memberi manfaat perumahan khusus kepada golongan B40 yang mempunyai tanah sendiri atau tanah milik ahli keluarga yang diberi kebenaran, sebanyak 47,714 unit telah siap dibina.

Selain itu bagi golongan M40, program-program **Rumah Mampu Milik (RMM) dengan harga jualan RM300,000 dan ke bawah** seperti Perumahan Penjawat Awam Malaysia (**PPAM**), program perumahan di bawah Perbadanan PR1MA Malaysia (**PR1MA**) dan **SPNB** yang memberi manfaat kepada golongan M40 juga akan diteruskan bagi memastikan bekalan RMM di seluruh negara mencukupi dan memenuhi permintaan pasaran. Setakat ini, terdapat **23,841 unit PPAM, 21,183 unit perumahan PR1MA, dan 27,518 unit Rumah Kediaman SPNB telah siap dibina.**

Saya mengucapkan terima kasih atas pertanyaan dan keprihatinan Ahli Yang Berhormat mengenai pembinaan hartanah mewah yang tidak seimbang dengan permintaan rumah mampu milik. Isu ini akan sentiasa diberi perhatian oleh Kementerian dan penyelesaiannya memerlukan kerjasama daripada pelbagai pihak termasuk pemain industri.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB TUAN CHA KEE CHIN (RASAH)**

**TARIKH : 1 NOVEMBER 2021 (ISNIN)**

**SOALAN**

**TUAN CHA KEE CHIN [ RASAH ]** minta **MENTERI DALAM NEGERI** menyatakan apakah pendirian Kerajaan dalam memberikan taraf kewarganegaraan kepada kanak-kanak yang dilahirkan di Malaysia, dengan ayah kandungnya warga Malaysia tetapi ibunya warga asing, dan pasangan ini telah mendaftarkan perkahwinan selepas anak ini dilahirkan. Kenapakah hasil ujian DNA yang mengesahkan hubungan bapa-anak tidak diiktiraf dalam pemberian taraf kewarganegaraan.

**JAWAPAN**

Tuan Yang Di Pertua,

Untuk makluman Ahli Yang Berhormat, kewarganegaraan seseorang individu adalah ditentukan berdasarkan kepada status perkahwinan ibu bapa kandung yang sah berdaftar mengikut undang-undang negara dan taraf kewarganegaraan ibu bapa kandung individu berkenaan sewaktu kelahiran berlaku selaras dengan peruntukan Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

Sehubungan itu, semua perkahwinan di negara ini hendaklah didaftarkan di bawah perundangan negara yang berkuat kuasa, sebagai contoh jika perkahwinan pasangan bukan Islam, ia didaftarkan di bawah Akta Membaharui Undang-undang (Perkahwinan dan Perceraian) 1976 [Akta 164].

Oleh yang demikian, bagi kelahiran yang berlaku sebelum pendaftaran perkahwinan ibu bapa mengikut perundangan negara, taraf kewarganegaraan kanak-kanak tersebut adalah mengikut taraf kewarganegaraan ibunya selaras dengan peruntukan undang-undang di bawah Seksyen 17, Bahagian III, Jadual Kedua, Perlembagaan Persekutuan.

Untuk makluman Ahli Yang Berhormat, keputusan *Deoxyribonucleic Acid* (DNA) ini hanyalah sebagai dokumen sokongan bagi mengesahkan pertalian darah seseorang dengan ahli keluarga yang lain khususnya di antara kanak-kanak dengan ibu atau bapa ataupun dengan adik beradik yang lain dan tidak dijadikan sebagai bukti konklusif dalam pemberian kewarganegaraan Malaysia. Ini adalah kerana setiap pemohon masih perlu mematuhi undang-undang lain khususnya yang berkaitan dengan pendaftaran perkahwinan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS (2021)**

**PERTANYAAN : LISAN**

**DARIPADA : PUAN VIVIAN WONG SHIR YEE  
(SANDAKAN)**

**TARIKH : 1 NOVEMBER 2021 (ISNIN)**

**SOALAN**

**PUAN VIVIAN WONG SHIR YEE** minta **MENTERI PERUMAHAN DAN KERAJAAN TEMPATAN** menyatakan secara terperinci jumlah rumah setinggan setiap daerah di Sabah dan apakah perancangan Kementerian untuk mengatasi masalah ini.

**JAWAPAN**

**Tuan Yang di-Pertua,**

Saya mengucapkan terima kasih kepada Ahli Yang Berhormat kerana prihatin akan persoalan rumah setinggan di Sabah. KPKT sememangnya bertanggungjawab menyediakan perumahan yang berkualiti, kondusif serta berdaya huni (*livable*) kepada pelbagai kumpulan sasar, terutamanya golongan berpendapatan rendah.

Untuk makluman Ahli Yang Berhormat, jumlah rumah setinggan bagi keseluruhan di negeri Sabah adalah berjumlah 23,778 unit. Perincian bagi setiap daerah adalah seperti berikut:

<b>Bil.</b>	<b>Daerah</b>	<b>Bil. Rumah</b>
1	Sandakan	6,516
2	Semporna	4,297
3	Tawau	3,600
4	Lahad Datu	3,711
5	Kudat	2,285
6	Beluran	484
7	Putatan	496
8	Kunak	415
9	Penampang	255
10	Pitas	417
11	Keningau	463
12	Beaufort	177
13	Papar	207
14	Nabawan	168
15	Kinabatangan	71
16	Sipitang	62
17	Tongod	39
18	Tenom	47
19	Kota Marudu	9
20	Tambunan	2
21	Telupid	57
<b>JUMLAH</b>		<b>23,778</b>

## SOALAN NO : 34

Seperti Ahli Yang Berhormat sedia maklum, Program Perumahan Rakyat (PPR) yang dilaksanakan sejak 1982, antaranya adalah untuk menangani isu setinggan di bandar dan juga luar bandar. Setakat ini, Kementerian telah membina sebanyak 154 projek PPR di seluruh negara yang merangkumi 97,196 unit rumah.

Untuk makluman Ahli Yang Berhormat, pelaksanaan projek **PPR di Sabah setakat ini merupakan bilangan yang terbesar** iaitu sebanyak **33 projek yang telah siap dibina** merangkumi **23,009 unit** dan **5 projek dalam pembinaan merangkumi 3,090 unit**. Secara keseluruhannya, bilangan **PPR yang telah siap di Sabah** merupakan **21.4% daripada bilangan PPR** yang telah dibina di seluruh negara.

Sebanyak 5 projek PPR sedang dalam pembinaan di Sabah seperti berikut:

- i. PPR Kiansom, Inanam (1000 unit);
- ii. PPR Jalan Tungku, Lahad Datu (650 unit);
- iii. PPR Gayang II, Tuaran (500 unit);
- iv. PPR Tagasan (500 unit); dan
- v. PPR Pitas (440 unit).

Kerajaan akan terus komited dalam menyediakan PPR kepada golongan yang memerlukan. KPKT memohon agar Kerajaan Negeri Sabah akan terus membantu mengenal pasti cadangan lokasi yang bersesuaian untuk program-program perumahan mampu milik di bawah KPKT khususnya program PPR.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SIVAKUMAR VARATHARAJU NAIDU  
[ BATU GAJAH ]**

**TARIKH : 1 NOVEMBER 2021 (ISNIN)**

**SOALAN**

**TUAN SIVAKUMAR VARATHARAJU NAIDU [ BATU GAJAH ]** minta **MENTERI KESIHATAN** menyatakan prospek 'medical-tourism' bagi negara kita pasca COVID-19. Apakah langkah-langkah yang diambil oleh Kementerian ini untuk mencergaskan lagi sektor 'medical tourism'.

**JAWAPAN**

Tuan Yang di-Pertua,

1. Prospek sektor pelancongan kesihatan adalah sangat tinggi dari segi sumbangan kepada pembangunan ekonomi negara. Adalah diunjurkan bahawa pendapatan bagi sektor pelancongan kesihatan akan mencecah sebanyak RM800 juta pada tahun 2022 dan dijangka akan meningkat kepada RM1.7 billion pada tahun 2025. Limpahan impak ekonomi bagi sektor pelancongan kesihatan pula dianggarkan boleh mencecah sehingga RM6.8 billion pada tahun 2025, dengan mengambil kira perbelanjaan pengangkutan, penginapan, makanan dan minuman, *retail* dan pelancongan.
2. Kerajaan sedang mempergiatkan lagi usaha pemulihan industri pelancongan kesihatan antarabangsa untuk memperkukuhkan kedudukan Malaysia sebagai destinasi pilihan yang selamat dan dipercayai bagi pelancongan kesihatan di rantau Asia Pasifik.

3. Dengan ini Kementerian telah mewujudkan *Malaysia Healthcare Travel Industry Blueprint 2021-2025*, yang menggariskan perancangan lima (5) tahun bagi memulih dan membangun semula industri pelancongan kesihatan negara. Antara inisiatif-inisiatif utama yang sedang dilaksanakan oleh kerajaan adalah:

- (a) Promosi digital dan penjenamaan secara strategik melalui kempen “*Malaysia, the World’s Healthcare Marvel*”, dan aktiviti-aktiviti atas talian seperti *health talk*, Expo Virtual, serta kolaborasi promosi bersama agen-agen di negara sasaran;
- (b) Penjenamaan Malaysia sebagai destinasi rawatan *niche* melalui program *Cardiology Hub of Asia*, *Fertility Hub of Asia*, dan *Malaysia Cancer Care Centre of Excellence*. Usaha ini akan menggalakkan lagi pelaburan swasta modal insan, infrastruktur dan teknologi dalam bidang-bidang rawatan khusus ini;
- (c) Mewujudkan Kerangka Digital Industri Pelancongan Kesihatan dalam usaha meningkat serta memperbaiki pengalaman pelancong kesihatan di sepanjang rantai penerimaan rawatan mereka di Malaysia. Ini termasuk menggalakkan hospital-hospital untuk mengadaptasi konsultasi dan rawatan secara atas talian;
- (d) Melaksanakan Program *Flagship Medical Tourism Hospitals*, dalam usaha untuk mengenal pasti hospital-hospital ikon swasta (*iconic hospitals*) yang benar-benar mempunyai komitmen untuk melonjakkan kepakaran dan keunggulan perubatan serta perkhidmatan mereka ke peringkat global; dan
- (e) Mengkoordinasikan Program *International Retirement Living* yang menawarkan pengalaman selesa dan selamat bagi segmen pesara yang kian meningkat di rantau Asia. Limpahan sumbangan ekonomi akan dinikmati oleh sektor perubatan, pelancongan *leisure*, hartanah dan juga pelaburan.

Sekian, terima kasih.